



13 1/2 x 2 1/2
8 1/2

函 1 册 書号 13507

辛筠谷年譜

55045

辛筠谷年譜

辛筠谷年譜

己卯迄乙未自記以後不孝桂雲等補輯

辛氏系出隴西自南宋時始祖竭公遷江西萬載

曾祖三登公諱金澄邑廩生以府君官

馳贈資政大夫光祿寺卿 妣夫人高氏李氏

祖古才公諱汝獻拔貢生任湖口縣儒學教諭以府

君官累

贈資政大夫內閣學士兼禮部侍郎 妣夫人龍氏李

氏

辛筠谷年譜

55045

+920.5

0028

辛筠谷年譜

考潤軒公諱樹人附貢生累

贈如古才公 妣胥氏累 封太宜人累 贈夫人

伯兄魯傳公諱又會邑附生以府君官

贈贈通奉大人光祿寺卿嫂郭氏 封淑人

仲兄淑郵公諱炳晟進士即用知縣親老改教任撫

州府儒學教授以姪師雲官

贈贈承德郎戶部貴州司主事嫂宋氏安人

筠谷自記年譜 嘉慶乙亥夏五月

乾隆二十四年己卯十月二十八日申時從益生於

萬載縣小南門內街西之田下屋取小字曰竹根

因外家多竹 母以命之是年 先大夫潤軒公

年三十九歲 先太宜人胥氏三十八歲伯兄又

曾十六歲仲兄炳晟七歲長姊香姑已適宋二姊

瑤姑許字張 某生時 太父母太伯父二伯父

伯母叔父俱未及見見者惟大伯母龍叔母張

同祖兄弟九人某最幼

二十五年庚辰二歲

二十六年辛巳三歲 是年七月十四日未時聞宜

人生其舅氏宋廷元余從姊夫也姊名仙姑二伯父所生止此女

聞宜人周歲時宋願為兩家冰人遂訂昏焉先是

仲兄與兄嫂亦廷元媒合

二十七年壬午四歲 某襁褓時缺乳歷僱數媪最

後一棚籍健媪乳之乃足然素羸四五歲始脫乳

二十八年癸未五歲 先大夫受知學使周海山先

生煌時從兄炳昭以府案首兄又曾以縣案首同

入泮邑人榮之 先大夫為文古邃制義宗五家

縣府試輒前茅然不利院試年四十餘始遇海山

先生特賞云 是時風氣尚古居官者多清廉自

好故縣府案首前十名皆以識鑒相高所拔悉真

才得之者以為榮嚴進士在昌者方文翰先生弟

子也令吾邑取十名尤稱得人 先大夫與焉邑

先生李厚岡自云幼嘗讀 先大夫文 癸未甲

申之間仲兄方十一二歲有神童目縣府名噪甚

二十九年甲申六歲 五六歲時 先大夫教認上

下廳聯凡廿餘幅皆能識之細姊有摺扇先大
夫爲書唐詩數十首姊且讀且教余認皆能背覆
先大夫令就塾始亦欣然時塾師爲龍芳仲先生
性嚴甫入門見學徒受杖呼暑輒大駭怖反走
母憐其穉且羸請於先大夫姑待明年時以
末藥製糕不知何方也每嬉戲畢向母索食輒
以一糕授之

三十年乙酉七歲始入塾塾師徐英余同高祖姪
也年長從之讀厲甚屢受扑責皆以風聞在家好

弄細故不關書也是年誦王伯厚三字經及徐筆
峒詩經本白文外并讀總注盡三本所居田下

屋地低窪春夏閒輒浸是年邑中大水田下尤甚

水及其樓板時從師讀街東空宅

宅本五山宗長業先大夫與

二伯父叔父購得之後造新屋卽今所居宅亦被水司背宋姊迎余至

家避之下半年始移讀田下屋之西偏

謹案今書坊所刻徐筆峒本注文頗淺陋而

府君嘗言中有詩柄今則無之豈今所刻非復

徐本耶抑府君所讀別自有本悞記徐耶箋

此存疑 桂雲等謹注

三十一年丙戌八歲 從族人世輝先生 名學濬 邑附生 讀

街東空宅大雅及總注讀畢遂讀論語朱注盡一

本始學對句先生譽其可教仲兄亦從先生學先

生子燕燕余從母張孫壻也隨讀 吳中丞來邑

閱兵邑有吳公講堂為中丞祖觀察公 白肅 遺澤

觀察令吾邑有善政邑人建以祀之中丞來實為

此先生嘗為觀察門生因進冊頁且以冊中詞授

余讀然止讀一頁未竟也 是年髮忽自落服方

敷藥俱不效後有人言但日搽清油當自生至冬

春交果驗 細姊于歸張氏姊夫述祖 大姊夫 宋儒宗

三十二年丁亥九歲 從 先大夫讀街東空宅所

讀俱四書朱注

三十三年戊子十歲 從 先大夫讀四書注外兼

讀書經及禹貢注二書俱畢 是時邑人讀五經

者少 先大夫向習詩經至是改習書以年老兼

理家事所讀易忘故自誦不欲多并授某亦不多

先大夫善講解某聞輒省悟又本年所讀書必日

令總背無閒斷故書不多而甚熟終身不忘也他
師所授則不爾閒授以時文一二篇心躍躍欲試
適讀書至予小子其退句卽私擬一篇先大夫
覽而喜之是年初從讀田下西偏屋因街東空宅
方添購材木爲新居計而無藏木處將穿通空宅
之壁以儲之也先有棚已貯滿事畢乃移讀其中焉其後
半廳及東西房之壁俱穿通以容木而虛其前半
廳以授讀虛其東西房之前半以安牀席仲兄則
寢讀於東廊伯兄於樓上後伯兄爲友人邀去他

處肄業 時讀書甚樂用功有暇栽灌鳳仙花色
種甚夥花時繽紛夾路彌塲

三十四年己丑十一歲 先大夫以有家事延嶺東

家繼禹先生名汝啟邑附生教讀讀所如故先生教法甚

拘謂余聰敏授生書必過七百字然雖強記不能
熟也所解書必令覆解實照注圖圖道過無所發
明時方讀魯厚畬所集易注至君子體仁節解訖
令覆輒如所口授覆訖遂以爲能解矣不知實隻
字不曉也先年從先大夫讀時每私擬八股見

之輒喜以為大有靈機往往曲加圈點胸中亦自
 覺活潑有生趣至是一切嚴裁謂無隻字是處因
 止令學起講而授以兩譜調云照此填寫略換數
 字便佳學之半年心如枯井 先大夫偶來塾中
 見而駭曰死矣焉有如此印板而能通者乎因課
 所讀皆生甚蓋書既過多總背時先生多睡去遇
 有悞及不能屬處往往混過故致此是年易注讀
 完隨讀儲選左傳盡襄公之年始時從姊陳子三
 立數字皆來學端節罷去郭先立亦同學 大兄嫂
內姪

三十五年庚寅十二歲 從 先大夫讀街東空宅

場中之右屋蓋三衆續買五昌公產也 後併為
新宅 左

傳讀完讀古文析義閒授以時文每日作文一篇

時大兄二兄俱為人邀館他處惟某從讀 先大

夫家務漸繁每晨起授生書畢飯後即出塾其長

總書及溫書令某自背戒曰毋自欺書若生是汝

自悞終身也吾事多不能管汝矣某感悟如所戒

先大夫或終日不出試令背誦則皆熟以此愈信

不復監背寢則睡 先大夫足下每夜半蹴之醒

令背日閒生書及三日書背訖仍教之解并論文
法某輒豁然有悟文思漸進嘗市千頭竹紙一刀
每刀千張也幅甚闊每張劃四塊日以一塊謄課
藝一篇不使多費紙也早飯後出題令於自背各
書完後作之比午未閒先大夫歸塾時已脫稿
呈閱有清通靈活及用書生動處則色喜神怡或
有刺謬則長歎一聲每覘其忻戚以為喜懼云

先大夫教讀功課少而善引人靈機從之讀甚暇
豫心地活潑時有龍有成姑夫者姑母人沒老而貧偶

往來余家畱住塾中三衆輪日膳之龍借得從兄
克中三國演義余從而竊觀焉先大夫以為此
亦可悟文理不吾禁也惟常功斷不許曠缺其他
兒戲事遇有餘閒亦不甚禁然至稍涉賭賽及非
理事必痛撻而嚴譴之嘗因喜筵放學偶隨羣兒
出門外有賣柑者羣兒競圍繞估量辦數以為戲
余不知其賭也貿貿然亦從而估焉方高聲唱曰
九滿邑人以一辦為一滿忽背後有力敲其頂者痛甚反顧
則先大夫也駭絕悚走先大夫亟提歸與

先太宜人扑之加諄訓焉自後凡遇此類巖遠如

毒藥云是年仲兄成昏兄嫂宋氏

伯兄成昏不記何年當在余生

一二歲時嫂氏郭

鄉試首題為譬之宮牆

至

夫子之牆

數仞 先大夫令擬作曰他日好看闡墨此亦用

功之法是科 先大夫以理家未赴闈 宋姊因

妯娌不和移居余肄業處上棟甥崇慶生於此

時學師月課甚勤每課生童多者至二三十人學

師備午餐焉有族兄某欲從課而慮殿榜乃邀余

偕未告 先大夫也學師未出發卷不知為幼童

榜出名反遠在族兄上云題為恭而無禮兩節

三十六年辛卯十三歲 從讀如前讀禮記古文時

文 先大夫以文理漸明俾出應學師月課題有

己未冠之分余素不肖以幼童見長竟作己冠題

出榜在超等評語甚優題為夫物則亦有然者也

縣考龍河書院肄業童余亦與取大課列一等獲

紙筆獎題為語大縣尹陳公

成謨

院長巢有源先

生名起崙拔貢生時仲兄肄業院中某遇課期橐筆研就

課 冬縣考縣尹王公壽首場題勞之請益賦得

冬日可愛赴考童生千餘幼童亦二三十人從兄
 用晦炳炎文筆甚高而敏考必交頭卷至是余竟
 先之時天寒方伏棹下就火忽縣官遣門子指名
 索余去蓋適出坐堂得案上卷而賞之吏白幼童
 所交疑有倩代也再三詰考加獎借焉次場題子
 使漆雕開仕一節三場忘末場尊賢使能一節解
 案余在廿名前仲兄在十名內案首王廷輝以偽
 書致閱文崔見章得之仲兄臨場發疹文不盡興
 膽真亦草草幼童至末場惟存已與袁振藻張謙

是年宋姊遷居三百坵似在秋末冬初

三十七年壬辰十四歲 應郡試郡守程公化鵬頭

場題不知也知其說者招覆名在十幾覆題分人
 以財謂之惠再覆以剛毅木訥分四縣萬載得訥
 點名時程公諭曰汝次場文字不及頭場今日好
 爲之交卷復見賞榜出名仍十幾旋應院試學使
 者曹文敏公名文埴考古題先河後海賦他題不
 記矣先是諸知好欲余應古試 先大夫以非素
 習不允也諸知好乃慫恿仲兄并報余名投考比

入場首先交卷學使閱之有點頭處有微哂處問能背誦五經否應曰禮記未讀完左傳讀儲選訖餘皆全乃令背之諭曰汝書不及袁振藻之熟袁本報名背經者聞獎其書熱心甚愧之歸以告先大夫先大夫責之曰我本不令汝考古今出醜矣知好釋之曰有點頭處則見取也比入正場頭點爲郡守門尙未啟程公指示諸學官曰此幼童善文不信可面試之乃出不問馬爲題余應聲作一破承皆以爲佳正場題爲命之矣賦得暗水

流花徑余又交頭卷學使出見案上止一卷取閱甚喜立召面問令默寫末股訖復問能再作否應曰能亦出不問馬余卽案側立草一起講學使取觀之點頭曰足矣因問從誰讀讀何等文字具答訖余復白曰此起講新作破承則點名時府尊所試學使後語程公謂不肯欺人的非凡品云榜發余與仲兄俱取進仲兄縣學余撥府學縣人幼童入學自余始覆試題舜之飯糗茹草也一章是年竹渡聞外舅家迎余過門

謹案敬堂兄

紹業

亦於是科入泮與癸未科後

先輝映且三進士萃一榜鄉里尤豔稱之又嘗

聞府君言覆試日學使取正場卷濃圈朗誦

以示教官其問從讀則照報名冊以巢先生對

後學使特召先祖面加獎厲因囑仍請巢先

生故明年遵諭從師也

雲謹注

二十八年癸巳十五歲往胥家塘塏上省心軒從

巢有源先生讀先生以善講名然皆講章家言余

不甚樂聽同學亦無專心聽講者其功課早讀生

文飯後講書傍午方歇究於學業無甚益加以閒

談遊戲一日閒為學之時少矣故是年名為從師

究不如家學之有實在同學者胥家表兄三人又

有胥璉張魯川朱祥雲巢方庠等後惟方庠及先

生子飛鵬入泮餘俱終童生或改業是年科試

二等補增題為然則師愈與能哥

炳昭

一等補廩

三十九年甲午十六歲

赴鄉試主考錢籜石

載蕭

廣運

是年構新屋於南門老屋之左

即街東空宅

四十年乙未十七歲

新屋棟宇構就尙未裝飾偕

兩兄肄業其中 府君自記止此

補輯年譜

是年蔣學院 元益 歲考二等

四十一年丙申府君十八歲 蔣學院科考二等

二伯父取拔貢 遷新居 先妣聞夫人來歸

先妣幼嫻詩禮明大義外祖仲甫公愛之甚於

男太外祖宏毅公最嚴厲於女孫中特加器重

嘗謂 府君曰此女安靜曉事家費消弭不少

是汝家福仲甫公之卒也遺命以手創白塔田

佐奩費 府君赴弔聞之念其家計不豐力辭

諸外祖以問 先妣則曰惟壻命時 府君甫

十四 先妣十二眾兩異焉 舅家至今仰食此田

四十二年丁酉府君十九歲 應鄉試

四十三年戊戌府君二十歲 汪學院 永錫 歲考二等

四十四年己亥府君二十一歲 科考三等

考後發憤攻苦力求深入凝思所至往往廢寢

忘餐始作一藝稿或數十易迨後日作日減以

至無可易乃出以質鄉先生莫不欣賞猶懼其

譽也適厚岡先生歸因以十篇為贄所評尤切實與苦心相印 府君始自信焉

四十五年庚子府君二十二歲 鄉試錄遺第一闈
卷呈薦

於時文字有憑錄遺場後水南吳某自命居首
三外祖凌雲公閱其文曰佳則佳矣名當次我
泊榜出凌雲公居二吳次之相與索看 府君
稿皆歎服時 先祖方構別業為豪強所陵結
訟連年 先祖年老多病力不支 府君挺身

赴難屢蹈危機幸得直致科考失意而錄遺也

四十六年辛丑府君二十三歲 胡學院 名高望後 諡文恪

歲考一等第一補廩 題為吉月

四十七年壬寅府君二十四歲 胡學院科考一等

第一 題周人百畝而徹

四十八年癸卯府君二十五歲 領鄉薦六十九名

座師李松雲先生 名堯棟時官編 修後湖南巡撫 金蘭畦先生

名光梯時官中 書後刑部尚書 房師韓遂生先生 忘其名時 題 知清江縣

節用而愛人所以勸親親也可傳於後世不賢

而能之乎賦得月湧大江流

四十九年甲辰府君二十六歲 會試呈薦旋歸

五十年乙巳府君二十七歲

五十一年丙午府君二十八歲 六月丁 資政潤

軒公憂

先祖病癱瘓府君自京歸後侍奉不少離便溲
洗滌躬任其勞風日清和則背負出廳燕坐習
業於旁 先祖安焉居喪哀毀異常嘗聞諸母
言於時兄弟終年喪次減食柴瘠所不忍睹

五十二年丁未府君二十九歲 二月 不孝桂雲生

府君初生一女名貞金二歲而殤年月不可攷

四月注公孫龍子

五十三年戊申府君三十歲 設帳炊藜聞氏別業

五十四年己酉府君三十一歲 會試呈薦遂畱京

場後松雲先生邀同榜宴集適雷年伯 維霈自

外簾出先生問同年試卷高下年伯首舉 府

君先生問相見未日見而未審因指以眎之在

坐咸刮目焉 府君本金公取中而先生期許

獨至會先生出守特贈鸚鵡眼端研一方 殿

試卷四十日以鼎甲望汝 薦卷師李公黎

是年女秀金生

五十五年庚戌府君三十二歲 成進士會試第三

名 殿試二甲第一 朝考入選用庶吉士

座師韓城王文端公大興朱文正公工部侍郎

鄒念橋先生奕孝 房師御史張息園先生敦培

題皆自明也君命召不俟駕行矣使數人要於

路曰請必無歸而造於朝賦得老當益壯 殿

試原擬一甲第三進呈改因紀字筆悞也當書

卷時某年伯在旁喋喋攀談致悞半字 府君

未諳體式不知可刮也祇聽袁公駕山場外所

囑接寫本字於下故遭籤出時進呈十本洪穉

存年伯第一王蓮府年伯第二石琢堂年伯第

四前三本皆有籤獨第四無之遂得元而前三

遞降云 教習師余秋室先生集初學詩賦用

功甚苦雖嚴冬坐常達旦始大小課或居後繼

乃屢取第一

五十六年辛亥府君三十三歲 充 武英殿纂修

五十七年壬子府君三十四歲 與高麗使人朴齊

家金履度唱和甚洽

洪桐生年伯贈句所謂綺語新傳到海東是也

金允投契別後音問不絕告養乃已今詩都不存矣

大伯父於是年去世

五十八年癸丑府君三十五歲 散館授編修歸省

與葉蓮山大觀年伯同行至金陵始分手

五十九年甲寅府君三十六歲 省侍半年請迎養

不果挈眷北上八月至京住郡館次男師雲生

祖母以未慣舟車重違鄉井 二伯父亦謂北

地苦寒非老年人所宜力止其行乃命 先妣

挈男女隨 府君北舅氏聞洪音送之 府君

鞅鞅而別後言及常以為憾

六十年乙卯府君三十七歲 充 國史館纂修

移寓粉坊琉璃街招敬堂兄鄧浴儒先生同居敬

堂捷會榜 二伯父捷鄉榜十二月不孝辰雲生

浴儒先生榜後病癩故迎取調治每狂發不可

制時得 府君一言輒帖服然竟不愈明年歸
嘉慶元年丙辰府君三十八歲 二伯父會試同寓
敬堂兄成進士 是年恭遇

覃恩加一級請

贈潤軒公儒林郎 封母胥太安人

貶贈古才公祖妣龍亦如之

二年丁巳府君三十九歲

遊年作詩課與張九松先生 鵬展 游彤甫先生

光釋 蔣丹林 祥墀 祝蘭坡 會 秦曉峯 維嶽 諸年

伯迭為賓主約期會集一日 先妣出家釀爨

肝為餉諸公啜而甘之各罄索所有以歸

三年戊午府君四十歲 奉

命典福建鄉試得士鄭兼才等若干人

正考官莫侍講 晉 題唐虞之際陳其宗器周室

班爵祿也賦得聖言似水火是科所取多知名

士闡墨一出膾炙人口捷春官者略半閩中至

今稱盛 府君性清介沿途束僕從無騷擾仍

不時密察有吳升者倚師門薦抗辭請寬 府

辛酉年記
君痛叱之立作書貲遣始讐服莫敢不戢闈中
常供外一無所求或言燕窩可助精神者曰吾
無需此且籌之熟矣凡求應徒中飽耳監臨汪
公志伊號綜覈每公見必盛稱 府君清德莫
公語 府君此以愧我也殆不然 府君在
路有日記瑣屑具載入闈後忽失之求索數日
始得意見重或以此 途中有觀潮詩爲名流
推許伊墨卿先生嘗以索書今不存
十二月到京復

命奏對稱

自有寒素出身之

褒 是年女巧金生舅氏卒於京

四年己未府君四十一歲

睿皇帝親政派充 文淵閣校理會試磨勘官教習庶
吉士掌院彭文勤公揀辦清秘堂事兼撰擬應奉

文字

教習門生八人今止憶其六湯公

金釗白公鏞

張公

惠言

花公

杰

貴公

慶

盧公

坤

是年兩遇

覃恩加二級 國史館議敘一級潤軒公初

贈承德郎晉奉直大夫母胥 封太宜人府君本身封

典一請

馳贈叔父樹寶公承德郎 馳封叔母張太安人一請

馳贈外祖胥元會公奉直大夫外祖母宋宜人 移住

順成門大街 二伯父會試同居薦不售秋閒回

時師雲等漸長 府君 先妣常遣詣 伯父

所問訊博歡左右旋繞 伯父喜歸猶誇之

託江西郭長者持舅氏喪歸

長者好行方便事歲一來京部署旅櫬之難歸者價取僅足必親送至家不受謝故託之

五年庚申府君四十二歲 七月補授江南道監察

御史

時院中當保任言官文勤公集資深者問曰卿

雲黯鮑各言爾志 府君首應曰某無卿雲之

才且家有老母冀改章服圖歸養公愕然久之

曰可惜好翰林然孝思不可違遂以名上

充鄉試磨勘官勘駿順天策問錯悞七條 具奏

駿秋審情實疏 是年延張朴齋師應燮課桂雲

師雲 男四兒生

在京歷年授徒若楊方伯振麟王太守鳳翰羅

孝廉煥劉孝廉國仲費孝廉湘韓孝廉學陶胡

明經捷三劉茂才開鑑趙太守璠耿庫使泉達

漢章冲阿鄭太學紹蘭及朴齋師並畱寓受業

多得成就執贄時皆生監也朴齋師後亦得舉

先是英煦齋相國未第時定圃先生欲延為專

師為蘭畦先生所沮因畱教三世叔云

六年辛酉府君四十三歲 奉

命巡視西倉 具請改順天鄉試章程疏 恭遇

覃恩贈潤軒公如府君官仍奉直大夫母胥仍大宜人

貤贈古才公亦如之妣龍宜人 二伯父會試不售畱

京同寓 八月告歸養親

將行往辭王文端公公盛稱 府君安靜守約

無名士浮華習今日告歸愈微恬退金蘭畦先

生云尊慈八秩惟祝二十年後方議出山耳

府君頓首謝曰願如師言

十二月抵家 胥太夫人歡甚 是年 不孝辰雲

始發蒙亦從朴齋師 巧金四兒以痘殤於京

七年壬戌府君四十四歲 助宗祠金三百 節差囊所餘也

延族重慶師 名承毅 邑附生 課子姪館於田下老屋 二

月四男鵬雲生 冬為 不孝桂雲 授室聞氏 太學生榮

松公女

八年癸亥府君四十五歲 胥太夫人五世同堂請

旌設帳甘棠埭宋氏雲龍軒

從學者袁開慶宋廷英湯譽光周樹華袁豫慶

聞玉潤玉芝姪尙志彥瑜并攜桂雲親課之已

而師雲學為時文至秋亦攜往辰雲別從慶孫

兄在家授讀 省城黃中翰維照寄文附課

是年桂雲入縣庠 築享堂圍墻

在南門老屋之右即 先祖時構訟業也將營

享堂而無貲故基此以待今享堂成矣

九年甲子府君四十六歲 設帳江下唐氏支祠

舊學生外又有宋啓鯤唐莫家翰臣介福汪新

寶陸續來學

徵課邑人士於吳公講堂 議脩族譜任纂脩

辛氏族大人眾總其成者莫適爲主 府君身居局外所送稿致多妄易非善本也

倡立惜字惜牛局 邑中闢考事起

先是江西多閩廣流人居山豎棚謂之棚民考者另額副學使周以棚民漸少奏裁棚額萬載棚民獨眾因未便兩歧概歸土額棚民又多鎗冒占額愈甚逢考卽起紛爭舊規不復萬不相

安 府君亦固以爲然也奈學使李獨持偏見府君以交誼往剴切指陳祇允增額而不允分與制府各爲一議上中丞秦奉

命亭疑檄邑紳往見邑舉曾任知縣某者爲首以應服其才也而某承恫喝下其應如響中丞遂以合考議是與學使曹會覆矣某公恥負所任因悍然倡罷考議邑之人咸惑之 府君據理引例恍以利害舌敝耳聾終不見信樂禍者至羣起爲 府君難且謠詠焉是以有洋田之避也

十年乙丑府君四十七歲 初假館禮山東庵端節

後移江口劉氏橋屋

劉一恕慶雲辛清祥步雲宜春鄧大中姪登瀛

皆來學 萍鄉朱文藻別居考棚附課

族譜成 二伯父成進士歸 冬患耳疽甚劇

女秀金出閣

適袁公振藻
子監生省三

十一年丙寅府君四十八歲 仍館江口

朱文藻偕子榜馨宋掄廷宜春鄧大智袁大梅

新昌彭玉衡玉田玉華炳南劉觀潮俱來學

以考案兩至省會

中丞溫公

承惠

抵任檄縣請

府君赴轅初見

辭色甚厲疑有主持罷考事 府君具陳本末

乃釋然遂迫開滋事人名 府君不可曰有牘

在何必苛求同縣可自相許乎溫無以奪然縣

人遂亦願考 府君令子姪首先投卷辰雲甫

學起講亦為報名於是終試晏然大吏以為無

事矣 府君知其不足恃也金蘭畦先生適撫

江西 府君謁見時力言其事謂土客一日不

分禍端一日不息今雖勉強應命厝火積薪終必復然務乞縷析人告預杜其釁則造福甚大先生不能從致有明年之禍

是年二伯父任撫州教授

迎 祖母之官行不數里而歸畏乘舟也 府君送 祖母反獨居深念淚如綆親友有來看者方共慰藉謂不過數月之別何必爾忽見 祖母歸始破涕為笑云後 伯父特遣五兄夫婦來家侍養

即彥瑜

冬辰雲始從讀

先是每罷冬學 府君輒課所讀書皆生甚監令重溫必四過由少而多三過漸熟四過則一本一首可不讀而背然至來歲從師旋復荒焉至是為成篇故移以自教其教法如 先祖而勞倍之每夜半蹴兩兒醒先將師雲日間生書重講一遍又口授三遍使背亦三遍三日書亦三遍然後與辰雲講授並如前法乃使各背長總書其背雖同時然有悞即覺無可混者比明

總書已背訖府君講書最醒師雲所讀辰雲在牀已了然矣故異日生書最易熟
 若尚早則古文時文必講一二篇以待明府
 君生徒既盛應酬筆墨尤多自朝至三更迄少
 暇時然兩兒生書生文及夜讀詩賦古文一一
 皆講解口授背必三復溫書亦監背仍不廢構
 思五官並用殆不足矜辰雲溫書尤生其歲久
 未溫者更須口授以一二頁為一首照生書例
 總背無間迄今諸書幸免遺忘而心地不至全
 昧者皆我府君苦心教督使然也

孫女朝蓮生桂雲出

後適署萬年訓導宋鏞

十二年丁卯府君四十九歲 初館江口後移上高

泮田羅氏書塾挈眷奉太夫人於右

避邑人之亂也羅魁邦式邦殿邦宰邦袁豫慶之子受訓皆來學

是年邑人阻考 府君兩次進省 冬間奉太

夫人歸里

太守鄭公

鵬程

出示勸考不聽署令陸公

模菴

持中丞示招考明許奏請分額又不聽持兵列

械勢日張初中丞在撫州聞亂疑 府君與其
 事風示 先伯父 府君因以情形啓中丞始
 了然以 府君前言爲是既發示招考卽定請
 分額奏與學憲汪會銜矣無如把持不考何也
 於是不得已至於奏辦雖奏辦而額之不得不
 分固已如繪紙上也此中丞回

天苦心他日科道一摺遂邀

允議實基於此未嘗非府君之力

鄒疏空講道理豈如
金疏實陳事勢故部

議只本金疏中丞後語
府君曰吾委曲只爲汝乃功不見德反遭眾射

一控於妄稟之革員

本是搶册阻考
妄稟無人投卷再控於倡

亂者之嬖妾致 府君以清白之身兩次與庸

賤人對質訟庭思之可恨可痛也嗚呼 府君

之於桑梓可謂仁至義盡矣考當分則力求其

分以息爭端不惜再三請於大吏也考不可罷

則力距其罷以醒羣迷不惜怨謗叢於一身也

而昧昧者顧陰受其福而不知不功曲突徙薪

而上焦頭爛額誰爲禍首尸而祝之豈不謬哉

南昌周春祺昌祺在省執贄自後寄課藝不斷

十三年戊辰府君五十歲 館洋田二月以太夫人病遄歸

祖母驟得腫症醫家僉云不治 府君旦晚侍眠食湯藥不離左右

四月 胥大夫入養

府君之歸養也事事先意承志所欲得必致之所欲與必豐之一切起居服食寒煖燥濕之節無不體察入微歷任大府延主豫章友教講席皆力辭惟授徒近地以便定省 祖母晚年心

神恍惚往往無端悲怒然 府君至前開釋一

二語輒解顏為笑蓋愉色婉容先有以順之也

居喪哀戚如 先祖卽世時

十四年己巳府君五十一歲 奉安 太夫人靈柩

於炊藜乃就洋田館

新買呼田龍姓地已卜葬為猾吏所沮故姑淺

厝於是 新昌羅鴻書獻書森書毛際亨劉觀

濤李承恩皆來學

是年

萬壽覃恩加一級 師雲入縣庠 奉攤賠降級部文
因西倉花戶侵盜案也賠款五百餘金降一級
畱任不抵

十五年庚午府君五十二歲 就館江口

劉英馥龍堂唐冀子潤軒宜春王廷棟上高羅
運書俱來學宋廷英弟啓文附課

議立啟元書院

方事之殷也合邑隨波而靡 府君與同志九
人獨侃侃持正論遭疑謗不辭雖口眾我寡讀

書向道之士覺悟者亦不少是即貞復之機事

定 府君將出山相與訂久要釀貲生息俾買

地構精舍為歸田後歡會所名曰啟元志也九

人者先伯父教授公恬齋 時耕 袁公繪甫

振藻 王公介亭 介眉 張公恕持 亨衢 陳公桐村

鴻翥 汪公春圃 元英 高公鑑浦 湘文 家敬堂兄

今書院成矣橋屋舊基隔江可望惜前輩皆不
及見恕持公僅觀厥成也追惟始議能弗愴然

葬 胥太夫人株樹潭獅形 為不孝 辰雲 授室

王氏

萍鄉任贛州所
千總諱壩公女

十六年辛未府君五十三歲 將請咨入都遂由九

江沂武昌歷德安襄陽郡轉湘潭 閏三月 先

妣聞夫人卒 六月 府君歸

先妣患失血繼以氣痛 府君本不欲出因西

倉賠款行追甚嚴 先妣雖病劇忍痛勸 府

君速圖北上不得已乃之楚也扶病慘離思之

痛心 府君回至上栗市聞凶耗是夜作騷體

數千字到家上祭語語慘痛不忍卒讀 先妣

婦德母儀見重六姻才亦有過人者處事從容

意慮深遠屢獨當大故豫籌全局擇人授任隨

咨裁決不動聲色料理裕如故 府君無內顧

憂乃至公事疑難時亦咨之所見輒出意表深

合機宜雖不必盡用而常驗於事後其卒也

府君哭之慟如喪良友終身念之不去心病由

肝鬱自知不起因謂 府君曰此中苦楚君深

知之沒後得一口頭語文字一敘隱曲死不憾

故 府君祭文委曲詳盡剴切真摯恨當日未

知錄出以示後人也

九月葬

先妣周家市

後以水遷葬炊藜與府君合塋

遂攜不孝

等合家北上歲底至京住郡館

是年孫女素蓮

生桂雲出

後適邑文學劉炳輝

納庶母李氏

先妣志也

一十七年壬申府君五十四歲 二月補河南道御史

條陳在籍聞見州縣吏役之害得

旨通行

稽查俸米

同事富公勒禮

差完復查甲米

同事海公洪阿

海公有健鬪名臺中為 府君危 府君坦懷

待之可從者從否則堅定不移終任三月無事

九月轉掌四川道御史

同事祥公雲

奏長蘆法碼案

大學士勒應迴避司員英奎瑞弼寬明應解任得

旨交王大臣查覆 十月奉

命巡視東城

同事清公安

是年秋命桂雲挈眷偕師雲旋

里 冬與福建詩會聯吟

達玉圃

麟

郭蘭石

尚先

陳潼溪

玉銘

楊蓉峯

惠

元許萊山

邦光

廖儀卿

鴻藻

鈺夫

鴻荃

林少穆

則徐並請主盟 府君隨課評隲遇公暇則同

作至明年初夏止

十八年癸酉府君五十五歲 兼署福建道 值霖

雨奉

命領麥平糶

府君擇殷實舖戶分領作麩與司坊官更番分
路核實發籤交通冒領積弊為清陳笠帆年伯
致書云都中信來知平糶一事東城辦理尤為
得宜他日均平天下當如是矣

請區別囤積居奇之禁得

旨允行 又奏東便門違例搜查鞭傷致死事

時提督府掣獲私買米石出城者以舖戶囤積
居奇奏封閉至數十家米悉入官 府君查糶
時洞悉其冤疏請分別辦理明定章程并請照
舊章一石內准其通賣尋有門弁鞭傷負米人
事 府君查知米僅數斗咨會提督府合參治
臯苛禁遂弛 府君審斷明決所欲懲者權要
交請蔑如也然不諉怨同寅亦不發人私書怨
亦希焉判筆如山翻控莫能易後任夏公森圃
亟稱之值林逆之亂日夜巡查境內不少休時

聖駕未回人心惶惶謠言蜂起或妄指某處藏逆匪若

干甚至數千 府君處以靜鎮單車往勘立予

取結銷釋居民以安萬柳堂老道至今稱頌云

九月轉掌河南道御史連具二疏一言督撫甄別

之弊一言督撫延擱賊報之弊

甄別疏
畱中

林清之謀逆也其黨陰連數省約同日舉事而

案先破於山東先是金鄉教官以紳士密揭稟

學使張公

鵬展

張公飛咨撫院則以挾嫌黨護

咨回張公力爭乃委員吳楷往捕獲股首崔士

俊突出首逆藏伏情形所關實大疏中援及此

事適張公以失察從逆見劾得功過相抵焉

派磨勘鄉試卷 十月御史俸滿引

見以繁缺知府用旋升吏科給事中 具飭查兵丁攜

帶幼孩摺

三省大兵凱旋有擄掠子女歸營者主帥以收

養無依告已奉

旨妥爲收養矣府君詳論事理請飭查送歸有

旨密交各路大臣查核檢舉陸續資送約計數千口伏

讀富將軍俊覆奏時

上諭有云歲功之日逆匪家屬例應查明緣坐其被難
民人無依子女亦當由地方官撫卹收養若征兵凱
撤之時任其紛紛攜帶在賊匪遺孽既因此漏網而
良民子女竟至遠離鄉土淪於婢僕此與俘獲何異
甚非仰體朕惠鮮懷保之意也此次滑縣用兵朕屢
經申諭領兵各大員嚴飭各該兵丁等毋許擅取財
物而於攜帶子女一節實為意計所不及朕先引咎
自責那彥成等知愧與否清夜捫心自問可也若再

不認真查辦罪愈重矣仰見

聖主屈已聽言

虛懷若谷先臣何幸得此嘉遇也

旨內查出父母死
難者六名各予賞銀

並飭兵部定攜帶
子女議處治罪之例

條陳稅契事宜得

旨議行 具嚴搜檢正文體疏得

旨所奏是翼日更奉

申諭不准帶有裏坐褥 始換新車

壬申歲以來用丹林年伯已弃敝車行動時搖

夏聲絕異聞者不望而知辛御史車也

是年冬移住順成門大街

即辛酉前舊居距丹林年伯僅數舍過從甚適

師雲在家成昏媳宋氏

副貢賦梅公女

二伯父即世

府君聞耗悲慟損眠食親撰行略求蔡升甫之

定先生志墓手定其稿

二十九年甲戌府君五十六歲

會試巡牆

五月奏

戶部書吏濫索解員銀兩事奉

命偕刑部堂官會審論如法

十月轉掌兵科給事

陳酒商盤剝運丁之弊得

旨交浙撫查辦

旗丁運費向由道給奸商串通道吏給不以時

丁迫開兌因以重息取辦於是費盡歸商仍多

積欠 府君舉奏因請復舊規軍機姚亮甫先

生見而謂曰所陳實積弊惟李蔭原先生嘗清

釐之今無其人矣後卒如其言然

恩借由是得復阮公芸臺致書云浙江漕弊之奏江西

運丁亦得邀

恩賞借十萬仁人之言其利溥哉

署巡北城十日

向例五日一上城同事烏公

爾袞保

謂

府君審

決明敏聽之心開請更之凡三上無留贖

是年女良金生

後適雷壩同知唐公錫鐸子縣丞若馨

七月敬堂

兄卒於南學

孫初官生辰雲出

所居距南學遠且隔城

府君既哭敬堂留辰

雲治喪因獨歸其夜媳適分婉料理湯藥耽驚

恐皆 府君獨當之

師雲挈新婦來京

二十年乙亥府君五十七歲

二月升光祿寺少卿

管理秀公塋正卿西公琅阿甘公家斌滿少卿齡公椿

修本寺則例

四月因入直

召見論邪教事有

旨通諭

府君對正教昌明邪說自息邪匪蔑弃人倫以

利相誘小民不知教化嗜利亾恥故爲所動今

選人得官者不問風俗淳澆惟訪缺分肥瘠其

居官可知官自趨利何以教民欲正人心齊風

俗宜先端吏治所對深契

聖心褒采不遺焉

七月升通政使司參議

同事多公山張公鵬展海公福鮑公勳茂同公麟

三媳王氏沒

府君憐之賜祭焉

九月移居郡館

是年

孫鎮東生於家桂雲出

連年與丹林年伯喬筆珊年伯趙茵睦年伯唱

和甚多從學者李比部佩蓮李學博長鳳郭廉

訪文滙裘大令榮甲榮第許大令朝保胡比部

錫麟胡大令筠熊學博效曾劉茂才開芝

二十一年丙子府君五十八歲 部議降一級

逆匪妻劉閻氏曾備北城姚姓家其失察官奉

旨分別查議府君任祇十日應從輕英考功挾前憾適

內閣侍讀學士缺恐 府君得之普議從重三

日遂上知者咸不平 府君恬如也然是年當

考試差通參品次而體尊例與列卿同考閣侍

學仍應考差

俗稱半堂半司

考差時患痔正劇萬不能

應至考卿畧損又不敢不應

考卿黜陟所關恐蹈規避厥後

山東學差竟以通參考卿得之

五月應列卿試

經正民興論賦得兩息雲猶漬

力疾入試終卷跪書然出 宮甚早

七月升內閣侍讀學士

此又一缺也知好不平奉為設措捐復故開列

派稽查接談換卷 八月

簡放山東學政

府君到任陳謝銳然以人心風俗自任奉

硃批正人心厚風俗是汝之責勉之

通行月課

裁代書

始訟牒繁後生員輒令作文批抹處文行兼誨乃漸少

是年孫女小蓮生師雲出

後適廩貢宋廷英子監生景濂

二十二年丁丑府君五十九歲

春夏按試泰安沂

州曲阜兗州曹州五棚

濟寧州附兗棚

歸考濟南 秋

後出按登萊青三郡

沂州積習以匿名書陷人為能考蘭山日亦拾

得數紙場中提所陷者訊無它使坐案側面試

五人中進三仍飭掣辦投書者澆風以息濟南

有武生指控賄得十名者所指袁姓故長山巨

室 府君臨點提出與武生弟同坐案旁兩卷

皆佳因並取而斥武生名控訐風亦息東三府

動輒罷考前任每調停優容之考登州有黃縣
童不服闈格爲蓬萊令鎖項生童洵洵萌故態
府君立出嚴示傳各教官曉以利害又訪得爲
首三人斥革而名捕之肇釁者扣考考規倍肅
青州下學時諸生氈帽便服從事忸向俗也
府君若弗知者謂爲閒人而驅逐之責問教官
不傳秀才祇候而容市僧各記大過諸生始肅
衣冠進講畢重申教戒各慄然慙服退自是凡
遇試典無不衣冠者

遣

不孝辰雲

入都續娶路氏

懷寧進士寶慶同知諱華公女

是

年桂雲偕袁女來省桂雲旋歸 初官殤

二十三年戊寅府君六十歲 春夏按試武定東昌

臨清三屬歲試畢 課灤源書院 選試牘發刻

工價內給板繳進其帙俱備獎賞

錄文武遺 進

東巡詩冊 秋後出案泰堯曹曲阜東昌臨清 是年

爲鵬雲授室李氏

吉水文學後任巴陵知縣正晉公女

二十四年己卯府君六十一歲 恭遇

辛酉年

萬壽覃恩加一級 出考武定登萊青沂五屬 轉通

政使司副使 升光祿寺卿 歸考濟南科試畢

錄遺 考取優貢如額 劾章邱令竇琛掌責生

監得

旨革審 進

萬壽冊頁 十月卸學政事復

命承

溫諭獎勞 到光祿寺任 同事穆公彰阿齊公布森特公登額張公麟那公清安

府君在學政任場規甚嚴搜檢特真正場及童

生覆試日凡宅門外差役皆封閉入內給酒飯

惟留二名侍側聽喚鎮日攜卷坐堂監閱無弊

不燭閱文窮日夜力漏恆三四下不寐薦卷數

倍本額皆一手評定有不愜意即搜落卷頃刻

一束必得其尤又喜改削視生童如在塾時取

卷既求盡善落卷中一二可取亦有改至全篇

發學給看者其待士嚴而有體以為山東士風

樸直不難迎機利導其悍然無忌大半地方官

激成之下車後親作告示十數加以論說諄諄

辛酉年

三
誘勸使之樂從其蕩檢踰閑顯爲風俗害者必
繩以法若誤蹈文網情在可原必委曲調護之
尤惡非理陵虐士子章邱案外其咨行撤委革
役者如冠縣典史之毆辱事主汶上禮房之索
詐羅織荏平捕役之褫衣汗辱亦不下十數章
邱故著名開漕地 府君拜摺後亦恐羣不逞
聞風起因預出示倍切告戒而鄒平令李公_文
_耕適調章邱固 府君所特識以語中丞者也
多士踴躍輸將終其任無控漕事於先賢後裔

尤加意培植四氏學惟曾最微歲考時童生僅
三人擇其略順者進之而細爲批改俾悟法門
嘉祥宗聖書院本曾氏基而紳士改構者曾進
先代主紳士擅撤而與之爭教官左袒訟久不
決 府君蒞任以諸賢皆有廟曾子不應獨無
士子讀宗聖之書生過化之地興建祠宇祀及
先世亦分所當爲况碑記昭然因斷業歸曾氏
仍准生童肄業教官紳士斥責有差肥城令辱
有博士收其鈐記 府君召知府切責俾令資

送躬謝乃已淄川蒲畱仙墓道爲不肖裔盜賣
取煤案久懸 府君嚴飭封禁適兩造並控行
轅立押解勒限取覆不十日而案結臬司溫公
嘗諭郡縣曰辛學使在任甚拂若輩意去後當
復思辛學使也吾所關涉案牘多矣類可釀巨
獄者一經批斥悉歸銷弭若輩陰受其庇耳是
時三接 欽差自中丞下降革遣戍接踵都無
生監發難者則溫公之言不虛也而相規者謂
士氣宜揚而不可護其短豈不悞哉使車所過

輕騎減從嚴約無擾供饋悉省前任之半卽有
不至絕不介懷一日過新城因報馬越境未及
備餐令倉皇請臬請少待曰無庸縣去此遠待
席必不及凡食不過充腹耳燒餅麻花皆可也
令喜曰此甚易卽立門外自呼賣者取數籃至
頃刻上下告飽行矣曲阜考畢起馬向不備飯
而行甚早一日時已過午夫馬不齊眾飢忿請
召辦差者詰責 府君曰令短於才耳供應小
事一加詰責則索詐路開其傷實多令取錢速

買點心來比點心果腹夫馬亦齊 府君自若
令亦自若也其公館試院一椀一墊必令照原
陳設面召辦差家人檢查無缺然後登程常以
叔孫昭子自況以故州縣長其嚴而樂其簡卒
無怨者

始領全俸

自壬申補官歲以半俸抵賠款或言推延數載
可邀豁免者 府君謂非人臣所宜出也惟苦
自節嗇一切車馬服食皆它人所必不堪獨

府君甘之所以卒保清操而絕無債累比奉

恩詔豁免府君扣抵已全清矣 府君入都時僅存七

百金歷年支用尙餘三百曰此吾合家歸計餓

死不可動也宦海何常日日可以罷官可無備

乎吾罷官歸用此卽幸不至罷而貧勢所迫必

需動此者當決計歸休可復覩顏求助哉後三

百金至赴山東始資以治行裝其謹儉如此

是年三月孫惟寅生辰雲出 四月女九金生

九月孫秉衡生鵬雲出

生於南閣店

到京住校尉營

二十五年庚辰府君六十二歲 正月奉

命稽查東四旗覺羅官學

同事有奎公耀卓公秉恬

七月

睿皇帝升遐

府君感懷

恩遇哭泣盡哀奉迎後還署唾血數口向所無之症也

遂臥病半月仍按候入哭無間

御極覃恩加一級 是年元夕九金殤

中煤毒 君在署齋宿

孫女璋連生師雲出

後適安遠訓導袁開慶子文學芳泰

六月孫

晉卿生辰雲出

後

十一月遷板章胡同

即今宜分萬館

道光元年辛巳府君六十三歲 二月隨

聖駕恭送

梓宮奉安

昌陵 五月應列卿試

賦得季札觀樂論題失記

十月轉太常寺

卿

同事有色公精額曹公師曾餘失記

是年兩承

恩賜

左傳讀本一部紅錦二端江綢褂一連

加四級

山陵禮成 覃恩一扈送議敘隨

帶一 壇執事 特恩一得

誥授資政大夫 贈先妣夫人

誥贈二代 贈三登公妣氏高皆如之其庚辰封典

幸銓名年譜
馳贈胞兄又曾 封嫂郭氏 磨勘鄉試卷議敘紀錄

二次 是年移居前門內東城根因所寓出售也

吾三縣所有府君實贊倡之事在癸未 孫宗卿生於家桂雲出

孫女桂蟾生鵬雲出後適安福舉人謝文燿一歲卒

二年壬午府君六十四歲 上慎選授讀摺 三月

升內閣學士兼禮部侍郎銜

陳謝時

召見諭曰爾甚樸實無揣摩亦無希冀嗣後有所見聞只管如前直奏朕從無忌諱府君感激叩謝倍切悚

惶

派閱庶吉士散館卷新進士覆試卷 男鵬雲蔭生內

用具摺陳謝 奏官理穀當貧富交累摺

江西巡撫毓公岱有質穀章程奏已

准行矣府君力陳其弊有

旨交毓岱閱看如不可行即停止護撫鄧公廷楨覆奏

並不累民乃

交新撫阿霖妥辦會御史亦有言者阿公因奏寢其議

鄧公亦知其不可因陝西案發故意與府君相左此鄧公巧處

閏三月奉

命偕文尙書

子鞞陝西獄後文公回京復偕那制軍彥成會鞞

先是渭南柳全璧挾財勢殺人知縣徐潤受賕

爲之地屍親疊控因請驗鄧公廷楨時守西安

泥例文持不可且有將就了事之書審官承風

遏獄羅織屍屬悉加酷刑致二人斃非命制府

長公齡提審獄稍白而僅擬全璧緩決得援赦

又未究及貪酷御史王公松年上其事府君

偕文公研究得實悉以贓私人奏奉

硃批細心研鞫秉公持正可嘉之至案定皆論如法又

蒲城吳姓違例演戲爲差役詐贓自盡審官監

禁吳戚置役不究富平令黃緣得官老邁營升

又縱役開弔文昌宮致動公忿臨潼令龍鍾闖

冗同州守與所屬交財皆據實叅革差役治罪

有差至陝西州縣每歲兩次買馬實則計里斂

錢每里一次索銀十餘兩二十餘兩不等大爲

民害府君得呈行限已迫批交臬司辦理復

命時面陳其弊得

辛酉年譜

吳

旨交新撫盧坤查辦

是年以閣學侍郎請

誥贈兩代並請

馳贈胥元會公資政大夫外祖母盧氏宋氏俱夫人

初外家諱言盧母故已未請 贈未之及告養

歸始聞李表伯言之實結髮且有女不幸早沒

耳問 太夫人則曰母志也有重誓誰敢違焉

府君力言諸舅請立其主舅懼誓終不能從故

此次封典不 馳本宗而復 馳外祖者亟思

為宋母補過也胥家自是始立主云

鵬雲分發光祿寺學習典簿命以應得封典請

馳贈其外祖聞之琪公徵仕郎外祖母宋孺人 歲終

領 年賞

關東魚四雉一鹿肚一牛奶餅哈密瓜乾及乾果之屬各一二斤後歲歲有之

三年癸未府君六十五歲 七月奉

命充文淵閣直閣事 十月充武 殿試讀卷官 十

二月升禮部右侍郎旋轉左

尚書穆公騰額汪文端公廷珍

是

年九月孫履閑生辰雲出

四年甲申府君六十六歲 脩 大精通禮

府君與文端公悉心參考更正為多

會奏已故節婦守滿十年者准 旌表 七月兼

署吏部右侍郎 管理盧相國蔭溥尚書文公孚王公引之 八月會奏

兵馬司應改官制疏

時御史建言者以近來五城吏目贓案疊見皆

由官卑權重而正指揮專司相驗其任反輕請

以正副指揮分理地方詞訟並轄吏目有

旨吏部都察院議奏府君在部力主御史言是同官亦

謂然會臺中意見不合因各為議上事竟不行

其惜之

定稿時府君嫌其平弱立草一奏以滿堂不協止後盧相云恨不用風霜筆也

九月奉

命恭送

實錄

聖訓尊藏 盛京祇謁

三陵查工程收歲租

同行者睿親王阿公少空明阿

途次蒙

恩旨賞借馬匹事畢復

命恩敘加二級 十二月

簡放江蘇學政

周年伯系英病故缺

轉工部左侍郎 是年七

月鵬雲補順天府經歷

五年乙酉府君六十七歲 正月抵江陰接印 裁

江陰縣供饋及署差進奉

時前任病久未考者尙六府二州兼有拔貢遺才之試積壓案牘亦多半年間事繁期促又倉卒幕友難齊 府君竭力支持諸事認真倍形勞瘁精力自是衰矣使署薪米一切向取辦江陰令令輒以官價取辦於民縣役官廚因以爲利取多用少科派不輕王令照常規進 府君

曰養廉之謂何吾不可以累民峻卻不受自照市價取給焉又坐轎之類歷係承差供應 府君知承差積慣需索舞弊於其來也責問費何所出我不能受若輩分毫亦不能容若輩網利且吾自有轎烏用是溷我爲亟昇歸痛自改有犯決不汝寬皆悚惕出終任無肆行者然 府君權不下移供應單只一紙親交辦差州縣諄屬單外絲毫無取其考試場規除侍側二人餘皆關閉在內差役亦無從舞弊需索也

出巡蘇松鎮揚通五屬

太倉附蘇州考

裁拔貢部費節

孝請匾費 五月歸江陰坐考常州屬兼錄遺

七月出考江寧畢重錄遺會考拔貢優貢如例

所拔皆績學知名士貧者居多年鮮三十下者

南滙談元春近七旬矣高才偃蹇忽見拔學者

奮焉拔貢向有陋規六十兩名曰部費實則官

取四吏取二 府君牌示裁革惟書吏姑聽酌

賞不得多索節孝匾費既裁請者絡繹恐書房

紙筆不貲隨棚酌予洋錢歲不下二三十

九年奉

旨留學政任 課紫陽正誼暨陽各書院通行月課選

試牘發刻如東省例

暨陽每歲三課紫陽正誼歲一課皆捐廉獎賞後不復贅

六年丙戌府君六十八歲 春夏按試揚通江寧鎮

江四屬 六月回江陰值旱應禱而雨

故事早無禱謂挂牌

則抗租多 府君曰何需牌適 朔日行香絜齋默禱甘霖立沛

八月考常州

冬按試蘇松太屬 行司通飭所屬不得擅責衿

士 咨禮部通行僅業收生家應准捐考 是年

恩賜通禮一部 桂雲挈眷偕妹家來署省侍

年為各年譜

年

七年丁亥府君六十九歲 正月奏論收漕章程得
旨飭巡撫秉公妥辦 二月出按淮徐海三屬歲科并
考畢以疾返江陰

恩賜遼金元三史暨三史語解 八月疾漸差科考常

州 豐縣令朱鳴雷擅責生員咨撫院撤委訊辦
十一月出按蘇州考畢接

旨補授吏部右侍郎仍留任將考松江疾甚返江陰十

二月初七日具摺陳請開缺十四日命具遺摺謝

恩申時弃養 是年孫女蓉生生辰雲出後適孝廉彭士模子星耀

遺命助暨陽書院膏火三百元李松雲先生刻集

二百金

此項世叔臨甲時再三辭卻

支祖祠賓興堂各二百金

其諸親族先已疊有餽遺故不及

明年歸葬縣西炊藜村之玉堂

懸鏡形

府君試士最嚴辦案亦最決大抵義所當為強
直自遂不以時俗勢要移也如青浦收生婦子
孫冒考一案部議以本婦曾經驗奸跡類件作
應俟改業三代方准捐考從此攻訐日滋地方
官泥看部文都不辨驗奸與否 府君批不勝

批乃行司申明本意俾其通曉又恐各省亦然故自徑咨禮部得通行焉安東書院水毀前令師兆龍以入官房屋詳建二十餘年矣河官施雲梯貪其地謀於署令許某勾通放贖據為已有而愚紳士以擇地另建既而屋價兩空公忿上懇 府君檢查原卷檄司勒退歸業大吏或祖之且欲為紳士罪 府君致書移咨往復駁詰務究批准擅廢者司因議詳空還三之一

府君痛加批駁全空乃已批准放贖擅廢書院即司也藩司梁章鉅

時官淮海道嗣 府君身後因欠繳一日養廉梁遂行提家屬勒追以此松江有呈

子忤逆者大吏以教訓不先批斥之置子不究府君批府按律究辦以正倫紀丹徒有鄉宦姪惑其外祖李妾使逐繼而據其貲府讞援不得於所後親例通詳定案俱批准矣 府君以繼由祖定不得擅易祖妾不得稱所後之親斷令承繼如故而飭追貲產歸之合族頌德至莊午可一案據原詳某甲子似是曹姓自幼與乙女締姻甲將死以子屬乙乙使傭工於家未成昏一日

甲子磨房研麥女適至甲子拉扯調戲女不從
呼父母子走出乙取棍趕打子遂羞忿自縊今
甲族誣以外姦訪係莊午可主謀請斥革 府
君以辦案當分輕重人倫大變與訟師所關孰
重據詳情狀種種可疑受孤託而使備其不待
以壻可知自戲其妻訓戒足矣何至棍毆其有
傷可知及時相悅男女常情矧在夫妻即使不
從當相容隱何至呼叫其不以爲夫又可知總
之死者之有無冤抑定於女之有無姦情卽定
於身之是否處女批仰驗明女身詳奪審官終
不敢驗徒疊疊請革 府君愈疑堅批如故比
撫院咨革亦以此意復之嗚呼此豈無故偏袒
秀才耶迨午可被革畏刑逃避其人故豪士所
至人爭匿之而當事者追捕如大盜帶兵燒燬
村莊以致村民情急鍛成巨案臬使所詳遠望
村莊無故火起者然乎否也督撫奏辦時反以
不早斥革歸咎 府君於身後不思逃避構釁
皆由被革未革之午可奚事挺而走險乎當事

徒知狗劣員之請革一生以蔽重寃而不圖禍之至此於是不自咎而咎人爲保位計得矣如天理何午可正法後甲族率眾掠乙夫婦及女去燔以烈火死最酷見陶制軍疏此豈非寃憤已極明知干大戮而不顧耶嗚呼欲救一淫女至使法外人誅死相繼淫女卒不克救也早如府君所批豈有是哉計在任三年不侵擾屬官而深惡貪酷不徇縱敗類而曲護善良一意孤行計慮深遠因漕法偏重與蔣節相往返辨論

凡數千言冀其挽回無如所見一轍如水投石於是畢慮竭智思爲正本清源一疏將大員苛派擾累之處慷慨指陳見州縣甘苦當體卹不當調劑又以書院山長有名無實地方官亦困於誅求皆由大僚私人遙領乾俸之故擬奏歸學政查考而府君受病已深不復能下筆矣嗚呼痛哉自丙戌病起左腸時痛時愈後感淮地潮溼遂致附浮氣喘回署調理日見起色豈意連考二棚積勞復發竟致不治也當考常蘇

時已請汪解元能肅總其成蓋 府君所信服

者然去取甲乙必經手定雖臥病猶自攜卷反

覆校閱不孝等再三諫阻不肯少休迄今迴憶

猶髣髴几榻閒扶病披閱時也豈不痛哉生平

篤內行睦姻族忠

君信友

交友不為翁翁熱而安危利害相關獨深赴山

東時某給諫來送勢方赫 府君以謹慎自持

反覆相勸給諫不悟竟抵法山東匿名帖案

府君首得之以示立凡年伯使先自舉發而不

能從因當面燬之卒緣是得譴不復振丹林年

伯之被議也撫師雲而泣曰尊公若在吾不至

是必早勸嗇已豐人性端而與道廣而廉即之

我引咎矣

藹然可親而辟立千仞風裁獨峻故在鄉在官

絕無隨聲附和之事要一歸於中正為學亦然

漢宋諸儒無所偏主務求其是一切空談性命

及炫奇矜博家視之蔑如也手聚書數十萬卷

無所不窺而探要鉤元必求心得即至樂曲算

法悉究其微詩文現已付梓自有公評書法宗

顏魯公動必以正尤善大楷剛方秀健天骨開

張識者寶之 府君幼時夢中得句云千年神

物畱江左一點靈心到海南醒而筆之於書不

解其故比奉視學江蘇之

命不孝等

切切私憂常恐妖夢之是踐也豈意果卒於

斯耶今距 府君之卒二十四年矣宰木可材

雁行非舊雖 國史有傳所據僅官文書惟恐

溘先朝露直節清操半歸湮沒因蒐輯遺稿發

刻得 府君自記年譜數頁雖信筆記憶拉雜

登載似屬未定之稿而小時景象生趣宛然敬

謹錄出以存其真惜敘至十七歲遂已中止爰

就不孝等 見聞所及補綴於後中間自丙申至

庚戌缺軼尤多以故老凋零無可咨訪姑從其

闕然服官以後涯略具是輒並梓行子四桂雲

廩貢生侯補訓導歷署南康府教授長寧縣教

諭師雲 道光壬辰進士戶部貴州司主事辛丑

卒辰雲 道光辛卯舉人鵬雲 奉天府經歷丁未

卒媳女詳前及見孫六鎮東 從九品職娶宋氏

監生海廷女繼娶易氏惟寅 娶朱氏金山衛千

總映晨女秉衡 監生娶周氏邑廩生樹華女繼

娶劉氏翰林院修撰繹女晉卿 未娶卒宗卿 娶

宋氏按察司照磨賡女卒

履閑

郡附生娶唐氏

舉人濠女未及見孫四

鼎亨

辰雲子出繼師雲

娶唐氏姑夫若馨女

冠卿臺卿

辰雲子

佐卿

桂

雲子曾孫六

奉璋繼德賜祺

鎮東子

繼德

出繼

宗卿

潘生康生安生

秉衡子理合備錄倘蒙

大人先生賜之采錄以光幽潛世世子孫感且不朽

道光三十年

不孝

桂

雲等謹述

賜進士及第 南書房行走前任山東學政翰林院修

撰年姻愚姪劉繹頓首拜填諱

江蘇學政辛公行狀

宜興李兆洛撰

公諱從益字謙受一字筠谷姓辛氏萬載人自高

曾以來皆有隱德公生而穎悟敦篤侍先贈公讀

書贈公或以它事出讀書之暇不事嬉游公獨覽

觀傳記而已年十許能作文十三就童子試遂冠

其曹中乾隆四十八年舉人五十五年進士選庶

吉士充 武英殿纂修官散館授編修充 國史

館纂修官福建鄉試副考官 文淵閣校理教習

已未庶吉士辦理清秘堂事兼本衙門撰文擬進

文字爲掌院南昌彭文勤公所特賞遷江南道監察御史母胥太夫人春秋高陳情歸養家居十年以承歡講學爲務非公事官府莫或見其面胥太夫人旣終服闋入都補河南道御史奏言書吏貸銀結官差役橫掣平民保甲廢弛供應取媚官署攜帶多人家丁挈眷外住吏役服色不辨凡七事蓋公自告養家居時目擊地方官吏玩法蠹民之弊有如此者尋轉掌四川道御史巡視東城兼署福建道御史是時京畿多雨米價騰貴奉

旨發麥丕糶公因擇富賈屑蘇麩以便民食又懼賈與奸民交通旨取貧民或致向隅乃實力稽核必使普沾

上惠山東巡撫陳預聞而善之移書云它日佐

國家均平天下當如是矣轉掌河南道御史上疏請飭督撫詳慎甄別以澄吏治略曰外省甄別與京員不同京員耳目甚密稍有徇私弊難逃

皇上洞鑒督撫所居距京師或數千里若公忠爲國明體達務之督撫所甄別自中正無私不然者居心

吳中遺愛錄 卷之五
未淨所識又偏權勢既尊操縱甚易或徇私容庇
或任性糾叅恐所謂衰庸者不果衰庸而眞衰庸
者反逃吏議也且督撫好尚各殊斯其所甄別亦
異剛決者喜果銳則必視安靜之吏爲庸鈍明敏
者喜圓通則必視慇直之士爲庸迂甚至以利口
捷給爲才因以厚重少文者爲庸以供應承順爲
才因以趨迎簡拙者爲庸豈知州縣有當切責之
處亦有當體恤之處如案件之久懸不結錢糧之
延宕不交盜賊多而不勤捕緝胥役擾而不嚴約

束此宜切責者也江浙多民欠而官墊爲難漳泉
多械鬪而官辦不易江南有慣鬧之漕收福建有
難銷之鹽課倉庫之虧或由前任軍需之歲豈無
分攤此宜體恤者也大員過境家丁婪索託銷書
籍書未到而價先付囑薦幕友幕雖劣而俸必捐
若此之類不可勝舉其應命者爲能員不能者則
爲庸吏矣其或自恃公正過爲刻覈接見屬員勤
加呵叱州縣震恐駭汗詢以公事不敢出聲倘一
概目之曰庸亦恐下情不通而所謂庸者非眞庸

也臣愚以爲大吏必持廉法之大綱略趨承之末
節貴辦事之勤能責安民之實效揣時勢之難易
量材分之優絀而又常存敬畏之心然後能爲生
民黜庸吏能爲天下惜人才滿歲引

見以繁缺知府用俄升吏科給事中豫東賊匪方殄而
大兵凱旋有擄掠被難子女歸營者主帥以收養
無依人告公奏言被難子女因兵馬匆促致父母
兄弟不能相保若聽兵丁攜養地方安靜之後其
父母生歸故里思念子女旣屬悽愴卽或父母兄
弟俱已不存而其祖宗廬墓僅賴此一綫之傳不
能歸守亦可矜念且倥偬之際玉石難分難保無
仕宦子孫離散相從應請飭詢明籍貫居址發所
在官吏送其歸家由是保全者不下萬口轉兵科
掌印給事中升光祿寺少卿入直

召見

睿皇帝詢及邪教事宜公奏正教昌明邪說自息近日
邪教蔑人倫以利相誘小民不知教化故易爲煽
惑而今選人得一官不問風俗之淳澆惟計缺分

之肥瘠自陷於利何以教民欲正民風宜先責成
牧令也升通政使司參議內閣侍讀學士提督山
東學政銳然以正人心厚風俗爲已任以爲山東
士風樸直不難迎機利導乃諄諄誘掖使之樂從
至於良莠不齊非種宜去則擇其蕩檢踰閑大爲
風化害者痛繩以法使咸知儆若安分守法陷入
文網者則委曲愛護之必白乃已嘉祥縣故南武
城也故有宗聖書院曾氏子孫微弱紳士或與之
爭肥城令辱有氏博士章邱令擅責生員公皆直
之時論翕然其校士也規矩整肅先嚴內而後其
外重門扃鑰日坐堂皇閱卷監視不少懈升通政
使司副使光祿寺卿

今上初御門首擢公太常寺卿未幾擢內閣學士兼禮
部侍郎

贈三世如公官陳謝時

召見諭曰爾人甚樸實無希冀亦無揣摩嗣後有所見
聞只管如前直奏朕從無忌諱也蓋公官太常時曾
具疏有所舉劾云會江西巡撫毓岱有官理穀當

吳中遺愛錄 卷之五
議公力陳病民狀因言封疆大吏爲治宜總大綱
因民所利去民所惡交易宜聽其自便自來官多
一令卽民多一累今民間典賣穀石本屬相安譬
人本無病而投以藥劑適足爲害議遂格渭南柳
全璧挾財勢殺人令受賊郡庇之鍛鍊屍屬有死
者公奉

命往鞠發其贓私論如法歸充 文淵閣直閣事升禮
部右侍郎隨轉左兼署吏部左侍郎恭送

睿皇帝實錄

聖訓尊藏 盛京役歲任江蘇學政轉工部左侍郎自
以孤寒受

主知寵遇日隆圖報踰切一切訓士衡文卻供餽裁陋
規辦案杜弊視山東加謹雖精力少衰不恤也適
巡撫陶澍奏創收漕章程奉

上諭江蘇漕務疲敝已久閭閻每苦浮收而各州縣用
度浩繁不能不藉資津貼抗玩者卽因此挾制以爲
控端必應力加整頓務令兩得其平固不使不肖官
吏婪索病民亦不容衿棍把持藉端訐告著該撫移

步中遺錄卷之六
六
咨學政查察若拖欠較多實係有心抗糧停其考試
倘有仍前縱恣者該學政亦卽查明斥革移咨該撫
審辦不得稍涉徇縱公上疏曰江蘇漕額本重豈堪
浮收無節州縣之津貼自應調劑閭閻之拮据尤
宜體恤久予定額尙肆苛求明請浮收必滋流弊
撫臣之意謂控漕之人卽包漕之人臣以爲未必
盡然官之收漕必用書役書役貪狠必圖肥己官
旣浮收吏又朘削不特淳良小戶受害卽淳良生
監亦受其累累之不堪因而上控亦有不得已者

撫臣又稱因生監需索漕規地方官費無所出因
取償於淳良小戶以爲牽長補短之計臣伏思書
役貪得無厭縱無此等生監小民之被苛徵亦斷
不能爲之稍減書役倚官爲庇倘加倍浮收無人
敢控獨何法以治之夫劣衿固律所不宥苛政亦
法所必裁矯枉勢必過正而創法宜防流弊管見
所及不敢不以上陳又致兩江總督蔣攸銛書曰
吳下漕務有積重難返之勢蘇松漕額本倍他省
自明以來惟聞民爲漕累不聞官爲民累今日浮

收之風益熾當事者不揣其本猥因一二滋事生
監遂欲偏重官吏苛索之權在大僚原期杜絕漕
規清淨收之源而在官吏卽以禁制膠庠恣浮收
之性生監旣無上控之路小民益復何賴使奸吏
得志善良受禍欲求無事不可得已公性廉靜寡
欲胸懷坦白不設城府然遇非理之事則棱角峭
厲不能爲當路屈意有不適輒形於言色而於國
家之事知無不言言無不盡蓋庶乎不負言責者
矣年六十有九終於江蘇學政官廨其爲學務適

於用不喜空談性命之書於漢取賈誼於唐取宋
廣平陸宣公韓文公李衛公於宋取韓范富歐陽
大程子蘇氏父子李忠定公於明取王文成公而
不甚頌其講學之說自經史諸子以及天文律算
地理小學家言無不博通所著有詩文集外集奏
疏稿館課偶存公孫龍子注各若干卷藏於家
論曰公之來蒞江蘇也余適主暨陽書院以後進
禮見公言論丰采恆有牖俗之心以爲士氣不揚
則風俗難返故有屈於有司而罰非當理者則必

反覆交論以平之乃或謂公一意孤行也余淺齋不能測公之行事從公子求觀奏疏遺稿略綜其梗概私述之志景仰焉

資政大夫吏部侍郎辛公筠谷傳

山陽縣教諭盛大士撰

公辛氏諱從益字謙受號筠谷江西萬載人曾祖金澄祖汝獻考樹人皆以公貴 贈資政大夫公少時爲學官弟子領餼中乾隆五十五年進士改庶吉士授編修遷御史歷官至吏部右侍郎平生內行醇備服官二十餘年與同僚出入風議必虛衷采納不以己意爲是非然性侃直不少唯阿事之當行者雖格於眾議必正色爭之其不可行者

直達所見不能爲權要屈以故忌且嫉者日衆而
上亦由此愈重之其官御史時嘗抗疏論督撫甄別衰
庸之弊謂剛決者喜果脫則必視廉靜之吏爲庸
鈍明敏者喜圓通則必視戇直之士爲庸迂以利
口捷給爲才因以厚重少文者爲庸以供應承順
爲才因以趨迎簡拙者爲庸其或自恃聰察過爲
刻覈一有不當呵叱隨之則屬官惴惴恐懼而下
情不得上達此人才所由失也又疏勘督撫延擱
賊報之弊嘉慶十八年邪匪煽亂三省密約同舉

有山東金鄉教官以紳士揭預稟學使學使飛咨
撫臣疑而置之經學使力爭始發吏卒掩捕約遂
破並突出賊首林清得就捕戮公直上其事謂民
望官以捕賊官卽望大吏之假手以捕賊若聞報
遷延反斥紳士爲挾嫌州縣爲喜事則州縣自審
兵力微弱轉恐激變誰肯捕賊官不捕賊民雖勇
於赴義而官必指爲誣妄賊更肆其荼毒是養癰
貽患實督撫有以致之也疏入學臣免失察學撫
臣旋奪職自是無敢匿賊報者是年冬

王師凱旋各路官兵有擄掠被難子女者公奏被難童孺因戎馬倥傯骨肉離散干戈旣靖各望生還若聽兵弁攜帶則父念其子兄憶其弟誠可哀憐卽或父母兄弟俱已不存而其祖宗墟墓僅賴此一綫之延異地飄零更堪矜憫矧瑣尾之際玉石不分或有宦族子孫逃散相從更當復其邦族俾奉宗祧得

旨密交各路領兵大臣自行查覈檢舉於是良家子女得送回籍者不下萬餘口歡呼之聲溢於衢路公自擢諫垣不一年卽陳請歸養服闋補官居言路三載屢上封事直聲滿天下茲特舉其大者其任學使以正人心維風化爲己責嘉慶二十一年以內閣侍讀學士視學山東下車之日親作告示十數條及儒以道得民論誘掖善類家喻戶曉不率教者繩之以法州縣有擅責生員者卽奏劾不少貸大吏至不敢左袒若在平章邱諸案維持調護賴公之力居多以故士氣日伸而向之挾持官府強悍不馴者皆感泣悔過改行遷善而不自知乃

吳中遺愛錄
知公之得士心者深也

今上嗣統公游陟卿貳

上在藩邸素聞公名一日奏事

召見諭曰爾人甚樸實無希冀亦無揣摩嗣後有所見聞皆如前直奏朕從無忌諱也道光四年以禮部左侍郎視學江蘇江蘇文風甲海內然近日士風不古懷挾公行公官給事時有正文體嚴搜檢之疏至是尤痛抑弊端諸生懷挾者立除其名不得開復童生則荷校徼倖既絕所得皆知名士其干預

公事者明正其罪若非其罪而誣陷者則愛護而昭雪之每與封置之臣意見不合輒寓書駁辨灑灑數千言無所隱忍或謂公指陳時事過於激烈而公不顧也卒之士習丕變舊染頓除而有司亦不敢凌辱士子者徒以有公在耳公受

聖主知遇廉直勁正風節凜然讀書而不負所學其公之謂矣所著有詩集文集外集奏稿館課偶存公孫龍子注藏於家子四人桂雲師雲辰雲鵬雲皆世其家學有公之遺風焉

吳中遺愛錄
盛大士曰余於丁丑客京邸有題壁詩公見而愛之及試士莅淮余以校官展謁恨相見晚試畢語諸生曰如博士盛君者真可以爲師矣嗚呼以余之材質庸下不克樹立誰復有過而問者不知何以得此於公也今公子承遺命屬作家傳余固非能文者爲公作傳卽所以自傷也悲夫

輓詩

子履先生
盛大士

蒼松無媚姿獨得乾坤正公以古名儒躬遇
天子聖立朝持大體臨事無不敬入叅廊廟謨出握文
章柄道氣含沖和柔色式儀令瑩然冰雪姿中有薑桂
性

愛民如保赤所賴慈惠師如何催科吏半屬良有司東
南日凋敝元氣誰扶持昌言闢羣議獨荷
主上知莠草固宜鋤勿傷蘭與芝苦心庇孤寒積憂病
難支失聲哭寢門此意復告誰

身中遺愛錄
士氣屈者伸士習衰者起鼓篋肄宵雅乃是進身始以
彼不肖徒穿窬弄長技或言法大苛誰識意良美冀北
別驪黃荆南采杞梓至今感恩者翕然稱國士

美人隔雲端嗟我落塵鞅自分爨後桐遑冀物外賞一

詩題江亭十年勞夢想陶然亭江氏所築一名江亭使車涖淮海王

事勞鞅掌我無孝章名公如孔文舉我非寒山石公爲
庾開府苦調空復彈哀絃不忍撫羊曇過西州落葉紛
如雨

我生胡不辰賦命嗟窮薄童烏輟元草予季年又弱秦

鏡堂前懸驪珠暗中索遂令樗櫟材亦荷門牆託開尊
悲喜集束筍詩篇作以詩受公知有淚爲我落我詩持
奠公我淚先已涸

一棹冒秋雨晨起謁我公歡其辱投轄欲效陳遵風抵
掌議時政出口無雷同家事及瑣屑一一詳始終客歸
不可留淒然與公別送我江之干昏黃日無色贈物表
素心何以報公德

客懷鬱不樂衰病日以深北去一葉帆遽令音書沈聞
公吳門歸亦受風霜侵道心定而靜瘦骨寒能禁泰山

胡然頽素車馳已晚巫陽下九閭或望靈旗返

古人慕脩名公自千秋擅曾聞有道碑絕勝丁儀傳諸
孤泣致詞猥以屬下賤負重力不勝答書手頻顛彈琴
不成聲收淚且磨研音容不可追文字空餘悲茫茫泉
壤隔此恨公其知

申者先生

李兆洛

哲人悲日遠模範自今垂樸訥仍儒素殷勤作導師薰
蕪令自擇蕭蕙許同滋已盡嗟薪火無窮是教思

文豈輪轅飾詞由德業成一心培 國脈百計拯民生

陳力無中外當官有性情願憑青史筆爲勒太常名

式亭先生

夏翼謀

江陰舉人

直聲自昔震京華南國欣瞻漢使槎山斗文章韓吏部

治安才調賈長沙冰銜正喜邀

三錫

南調吏部

棠笏何因棄萬家神物果然江左駐靈光千

載仰無涯

說士能甘志不紛親提玉尺起衡文別釐其畏犀然渚
物色能效驥出羣八郡仁風韓相疏百年教澤魯侯芹
歸裝僅有書千卷遺命猶將鶴俸分

吳縣舉人 潘遵禮

巍巍碩德頌名臣得仰風裁亦夙因政蹟卅年畱海內
楹書萬卷有傳人襟懷澹泊原由性棱角崢嶸望若神
衣鉢竊欣聯一脉常叨遺蔭坐生春

江陰拔貢 高觀國

臣心如水

帝心知

帝獎賢勞使節持執簡久從周柱史衡才猶想漢經師
起衰鉅手昌黎筆愛國深情子美詩此後江南諸士庶

遙瞻峴首淚盈碑

江陰廩生 祝陞芸 藝芳

月卿炳耀應昌辰鈞樂無端詔玉宸賸有良謨光史牒
難忘遺教植人倫

三朝翼亮溫公志七秩忠勤謝傅身那竟崇朝傾魯殿
海天詩識證前因

行已觥觥契

聖衷出山實政紀寰中玉壺心共冰銜潔犀燭光真水
府窮蓬島文章高白鳳柏臺風肅避花驄沂公舊有和

吳中遺愛錄
美志惆悵平生未竟功

三年使節駐東南

帝簡良工琢杞柁大雅扶輪風日上一時化雨澤深涵
昌黎望重天中斗白傅神歸海上龕此際榮哀知并集
碑題有道德何慙

江陰廩生

六承如

公去靈風滿素旗
謁來桃李徧江湄
天公付物原因物
化雨無私卻有私
屬纊尙然憐白屋
抗章曾與達

彤墀春申山畔清明節

是日清明靈舟機君山下

歲歲孤寒下淚時

江陰副貢

陳詩觀

神物畱江左千秋大雅師
朝廷容長孺學業薄桑兒
霖雨蒼生望龍蛇噩夢時
仁心根質朴猶有

九重知

江陰廩生

夏子齡

仙班自昔侍西清上界遷官媿六卿
獨抱中和全學養不因溫飽徇功名
文章舊價蘭臺重抗直風神柏府傾
引領三齊棠舍在至今遺愛洽仁聲

芹藻流徽徧岱東文旌此日駐吳中
盡教杞梓歸宗匠

漫說參苓駐藥籠八代起衰韓吏部五經設教馬扶風
從知玉尺量才慣一顧能教冀北空

傳聞晉秩掌中銓歲杪

綸音下九天四海方思歸藻鑑一星何遽隕台躔識畱
江左圓前夢靈返蓬山謝世緣惆悵河干風獵獵素旗
未發已潛然

敢效南豐燕辦香臨風灑淚奠椒漿勳名定付千秋感
朝野咸悲一鑑亾幸喜鯉庭傳舊德佇看鸞掖繼前光
士林無奈摧山斗執紼空教慟夕陽

江陰廩生 蘇逢盛

騎尾歸何早簪毫紀自今量才推玉尺報

主有冰心勲業畱銘鼎音徽寫素琴西州懷往德幾輩
淚霑襟

雨化三吳被風流萬口傳蕙茅芳自別朱紫鑑無偏遲
日還輝旒長風與送船迢迢望廬阜渺渺悵雲天

江陰增生 繆燦

詩識無端應夢中此時攀慕意何窮關心民瘼敷陳切
一體儒酸痛癢同學海津涯寒逝水公門桃李泣春風

吳中遺愛錄
緣知歸路原蓬闕海島先營白傅宮

江陰增生
高觀瀾

文星一夜隕蓉城鎖院風淒碧草生吏部詞章山斗重
長沙奏疏膽肝傾靈心早入當年夢神物應畱此日名
江左士民胥戴德更畱清俸佐陶成

江陰生員
夏之呂

節並匡廬峻胸如彭蠡寬口碑存直道人望重詞壇
聖眷三朝被公忠一念殫身騎箕尾去星斗夜光寒
使節欽來止銘旌痛遽行冰壺傳雅志水鏡頌神明才

屢單寒拔風惟兩袖清三吳式遺愛執紼挽同聲

江陰生員
曹宗瑋

秉心侃直度淵冲當代名臣譽望隆仁惠何慙公義胃
清廉饒有次膺風作人功在文詞外報 國情殷奏議
中此日素旌江上路愁雲黯澹霧空濛

清操峻節自嵯峨豈藉攀援與揣摩救弊補偏思慮遠
淳澆激薄性真多論文風暖言爲典抗疏霜寒語不磨
宇宙大名知久在典型衰謝欲如何

同上
周子良

士類痛山頽騎箕去不回名言垂汗簡圖像合雲臺不
朽陳琳筆遺芳陸贄才千秋青史在嶽嶽想風裁
共快坐春風陶甄惜未終三吳沾化雨一代仰宗工桃
李芳菲處菁莪樂育中卽看隆俎豆遺愛滿江東

同上
汪南杞

事業勳名一代隆共欽江左被春風衡文卓識金鍼度
造士溫如玉尺同不徇時流全學問爲維風化矢公忠
靈心一點歸何處梁木摧頽絳帳空

同上
王燦

九派西江繞羣星北斗垂學真千軸富人是五經師翔
步登青瑣鳴珂集鳳池篇章三代繼幹濟
九重知烏府邀榮後黃門拜

詔時丹忱抒素抱白簡肅

彤墀陶汰官階穆均平馬政治經文甄典冊緯武靜熊
羆

天語頻煩獎皇華厯碌馳寬清益詎覆明燭鏡無私文
曜瞻旄節卿雲擁翠旗冰壺懸白朗藻鑑孰能欺淑慝
分良莠胸懷率坦夷儒修殷訓迪士習飭條規節表窮

吳中遺愛錄
卷之三
三
嫠苦恩先戚黨施庚郵金卻餽丙夜卷猶披宗伯和
禮天官首六司鹽梅方待和藥餌遽難持騎尾天邊路
游仙夢裏詩貞珉從此壽奕禩仰豐碑

同上
繆尙誥

間氣鍾名世膺期誕哲人趨朝承

帝屢憂國問民頻和濟交方泰明良德有鄰感時謨自
矢報

主志先純翼翼丹衷啓平平 王道醇懷忠貫金石挺
節勵松筠事建無前烈心勞獨運神藝林欽架範文苑

荷陶甄丰采初瞻日幽遐共樂春惠風能滌盪和氣已
渾綸振刷奚其盪吹墟屈者伸方嚴神穆穆誘掖意諄
諄苗莠無教雜弓蛇詎足論法行民志定道直士風淳
正色原難悅溫言更可親大江同浩蕩崧岳共嶙峋方
祝綿純嘏何圖昧佑仁甌枚遲卜相箕尾遽登真國士
慙桃李明馨薦藻蘋他年崇俎豆教澤被無垠

同上
謝蕙
弟監生蓉

纔副天官望作霖俄驚幕府大星沈揚清激濁溫公志
後樂先憂范相心
時回逆未平公病中常以爲憂
直節祇今傳

國史孤忠自昔契

宸襟那堪重過衡文地桃李空爾一院陰

江陰童生

祝九來

金鍼憑造士玉尺仗量才詎意騎鯨去何時化鶴來
槎浮星漢沒風急薤歌哀幸有名駒在文章接上台
典型今已邈諫草永留芳空灑門牆淚均沾翰墨香
陶甄澄水鏡慘澹隕星芒此日騎箕尾還應返帝鄉

同上

袁居寬

作人宜雅化齊魯及句吳一代文章備三年政澤敷栽

培廉恥立裁抑梗頑無士氣爭身後方知教固殊
一路春風疾遺恩到處留共悲顏泰岳何止痛西州奏
牘光青簡文章重玉樓江蘋欣可薦千載仰風流

同上

宋景昌

淼淼江流接豫章恩波懷溯與俱長衡才汲汲崇根本
議政拳拳整大綱每念鹽車矜跡地頻頒華袞表窮孀
可能便作芙蓉主君阜廬山共秘香

江陰號芙蓉城

江陰教諭

黃昭時

量才玉尺頌當時文教綱常一已持深愧枯茅沾雨化

更栽小草沐膏滋

三小兒茲甫
受知人泮

三朝眷重訐謨遠四海心傾公論垂最是解苛新抗疏
昭人耳目繫人思

江陰訓導

孫澍徵

秉鑑江東經四載身騎箕尾望靈旗文章吏部光芒在
清白臣心冰雪知抗疏獨能言不避愛人猶見古之遺
廬山面目惟追仰應付他年青史垂

江陰縣丞

姚儲餘圃

文章節議賴匡扶海內咸欽正直模千載靈光上台斗

一泓止水貯冰壺休疑包老情難近須識韓公論有區

此日悲歌徧江左一回仰企一露禱

端肅齋居教化深誰人暮夜敢懷金蓋鹽自奉能行素
議論持公不徇今多士共沾遺愛澤下僚潛動恤名心
可知後報由茲定重盼庭枝早樹陰

使節泣江越今三載春風噓植士氣蒸蒸日上冀秩滿

入都勳隆甌卜何意積勞成痼星隕台躔儲備員幕

下朝夕追隨實政實心知之最悉當茲素旄飄空慈
雲斷望雖碩德景行未足表揚萬一而高山仰止不

禁情見乎詞感賦二章聊當奠醢云爾

江陰典史

王慶佑

卅載匡襄竭蓋忱

恩隆江左畀文衡方思造士登青瑣詎意騎箕返碧城
一代文名齊北斗千秋德業庇南荆從今遺澤留芹藻
里豆庠籩祀長卿

秩遷左選荷殊榮仙旆何因赴九京霜簡至今傳魯直
玉山何處仰裴清從教士類悲梁木共譜虞歌送水程
一點靈心竟何處海天悵望不勝情

誄

暨陽書院生童

惟道光七年十有二月十有四日

誥投資政大夫吏部侍郎提督江蘇學政辛大宗師薨
於江陰使院哲人其萎登靈在天具僚悲懷人士傷慕
名存體逝懋德何追其明年二月廿有一日將遷神於
萬載縣炊藜鄉之阡丹旆靡靡輻軒啟塗鏡挽喧巷奠
醢溢衢涕雨黯羣哀風結輿嗟夜壑之俄遷實士林之
不幸攀清輝而何及溯流風而含哽垂不朽於汗青之
編誄遺惠於翰杠之錦其詞曰

瑤源濬波靈根茂植誕承慶鍾清休載式維公初載天
嘏之純秀穎敷幹雲翹照晨含章在淵發揮或躍披藻
熙陽清塵熠爍卿雲騰霄需期而飛華省承明委蛇自
階乃陟柏臺上德通禮白簡霜寒丹忱水泚亭疑挈令
傳以古誼民無覆盆吏鮮幸覲乃升 朶殿是輔中台
耀金帶白威望允釐乃擢奉常咨經訊雅稽古之榮階
下車馬乃貳宗伯僚采肅然步武有節嘉議炳焉乃衣
繡裳覆獄平反惟明克允人無後言

帝重銓衡寄之荃宰搜寶岱宗探珠淮海朱紫不滄青

藍斯改登彼彥良別其瑣猥膏以化雨陶以惠風微言
啟誨是緯是綜約我惟禮推心則忠疏汗導滯類宮雍
雍繁公之學潭思潛會神猶淵鏡言成著蔡詞苑笙簧
藝林藻繪衆妙所該百流斯廢繁公之行智圓用方儉
而不峭婉而成章豐淳鎮澆守素葆光清切修履抱雪
凌霜人思愷悌

帝膺忠讜道與時隆業隨志廣方調和羹以福九壤傳
霖未沛騎箕遽往嗚呼哀哉易往者形不朽者心史臣
編纂士庶謳吟蕭蕭桃李慘慘餘陰有蘋有繁冀公之

吳中遺愛錄

歆安宮載考我公于邁匡廬峨峨長江派派易名錫諡
令典方逮維以告哀被之千載







